







道鄉先生鄒忠  
公文集

十三本





道鄉集序



文章以氣爲主如山川之有煙  
雲草木之有英華非淵源根柢  
所蓄深厚豈易致耶士之養氣  
剛大塞乎天壤忘利害而外生  
死胷中超然則發爲文章自其  
胷襟流出雖與日月爭光可也



孟軻以是著書屈原以是作離騷經與夫小辯曲說絺章繪句以祈悅耳目者固不可同年而語矣唐韓愈文章號爲第一雖務去陳言不蹈襲以爲工要之操履堅正以養氣爲之本在德宗朝奏疏論宮市貶山陽令在憲宗朝上表論佛骨貶潮陽守進諫陳謀屢挫不屈皇皇仁義至老不衰宜乎高文大筆佐佐六經粹然一出於正使學者仰之如泰山北斗也道鄉鄒公自其少時處閭里遊庠序登仕途其節操風流已爲有識者之所



推許至元符間職在諫省適有  
椒房之事抗章陳列危言鯁論  
聳動四方遠謫萬里及建中靖  
國間名還侍從又以直道不容  
于朝再謫嶺表而氣不爲之少  
挫遇赦得歸作知恩堂以居奉  
其母友其諸弟教訓其子姪欣

然不知老之將至所養如此故  
其文章高明閑達溫厚深醇追  
古作者有黼黻之文有金石之  
聲有菽粟布帛之用信乎有德  
之必有言也其子柄栩集公平  
生所爲文得古律詩賦表章四  
六襍著傳記序述及紫微制草



合爲四十卷將鏤板以傳於世  
求序於綱義不得辭且爲之言  
曰國之治亂安危存乎言而已  
矣方嘉祐治平間上之所以求  
言聽納者旣盡其道下之所以  
獻言開陳者又中於理上下交  
而志通宜乎協氣嘉生薰爲太  
平而不可跂及也其後朝廷議  
變新法言不便者接武竄逐朋  
黨之論浸興而士始以言爲諱  
自紹聖元符以來遂無言者當  
時臺諫具員然類皆毛舉細故  
以塞責甚者至於變亂白黑顛  
倒是非投時好以取世資雖謂



之無可也獨公奮不顧身犯顏  
逆鱗論國事之大者於言路閔  
塞之時號鳳鳴朝陽然遷謫流  
離屢瀕於死而任言責者益自  
懲艾不復激昂習孰見聞以緘  
默爲當然至崇寧宣和間則又  
甚矣燕山之役國之大故莫重

於此臺諫孰視未嘗有一言及  
之馴至禍亂四海橫流使公是  
時猶存居可言之地其肯保位  
愛身不一開口爲社稷生靈之  
計雖三尺之童有以知其必不  
然也由是觀之公之文章垂於  
後世誦而讀之者想望風采其



仰慕爲何如哉紹興五年歲次  
乙卯三月二十一日觀文殿大  
學士左銀青光祿大夫李綱謹  
序

道鄉先生鄒忠公文集自

卷之一

古賦二首并序

詩二十五首

卷之二

詩三十四首

卷之三

詩三十八首

卷之四

詩三十七首



卷之五

詩四十六首

卷之六

詩七十四首

卷之七

詩九十一首

卷之八

詩九十六首

卷之九

詩七十一首

卷之十

詩七十五首

卷之十一

詩七十六首

卷之十二

詩七十四首

卷之十三

詩九十九首

卷之十四

詩六十七首



挽詞 一十二首

卷之十五

制 四十四道

卷之十六

制 五十道

卷之十七

制 四十三道

卷之十八

制 四十四道

卷之十九

表 一十四通

卷之二十

狀 二十五通

卷之二十一

書 四封

卷之二十二

書 八封

卷之二十三

疏 三道

啓 二十五封



卷之二十四

啓二十九封

卷之二十五

記一十七篇

卷之二十六

記一十篇

卷之二十七

序二十篇

卷之二十八

序一十六篇

卷之二十九

策問二十二道

卷之三十

策問二十五道

卷之三十一

雜著一十六篇

卷之三十二

雜著一十五篇

語錄一十六章

卷之三十三



雜著 三十四篇

卷之三十四

墓誌銘 八篇

卷之三十五

墓誌銘 五篇

卷之三十六

墓誌銘 十篇

卷之三十七

墓誌銘 十一篇

卷之三十八

祭文 三十五篇

卷之三十九

行狀 一篇

卷之四十

行狀 二篇

傳 一篇

續集

疏

道鄉先生鄒忠公文集目錄終

鄒忠公  
文集  
目錄終



道鄉先生鄒忠公文集卷之一

古賦

憤古賦

并序

余讀離騷見屈平以忠不容而卒葬於魚龍之腹也憤然傷之故爲此賦

嗚呼屈平之忠曷不足以悟懷襄兮荐困乎讒口之  
嗷嗷流落江湖不堪其憔悴兮曾舊履不貶損乎一  
毫憤懣中溢不可遏以復爲無物兮操觚進牘遂大  
肆乎離騷博萬殊之動植而擇以比興兮匪故角勝  
負而爲此怵怵或超然曠蕩乎四方上下之表若無





以取信兮要其心之所存則惟冀君之我交後世有志之士覽斯文而想風采兮猶慨然永嘆又繼之號咷以此較彼輕重固有在兮如之何不從彭咸而投波濤人孰不有一死兮或重逾泰山或輕愧鴻毛惟平之死於忠兮使來者自悔其貪叨歷上古以稽君臣之盛兮邈鮮儷乎重華之朝稷契臯夔更相汲引以比肩於巖廊之上兮北之幽州南之崇山不聞流鯁直而放英豪聚精會神如一人兮成功獨巍巍乎其高夫何世而不生靳尚兮其消其長係人君之孰褒以唐太宗之賢卓犖近代兮於鄭公之既沒也停昏仆碑且不念其勤勞況本非其擬重以難明易聽之說兮宜其君臣之盛亘千祀而一遭幸大明之燭無疆兮間不能以容刀戒百鍊之剛化而繞指兮雖至陋也願初終乎所操

四柏賦

并序

廣陵學官廳嘗爲夫子廟今所居之堂卽其殿也庭植四柏皆凜凜合抱愛之而賦云

瞻廣陵之寂歷兮直高堂之崢嶸雜蔓草以如拭兮偉四柏之亭亭葉委蓋以固覆兮榦聳萃而上征根盤薄而石老兮皮皴皴以龍驚儼相揖以成列兮何



意氣之不可凌豈商山逸叟見邀於子房今將以翼  
儲君而經營抑康廬勝友自得於蓮社今方且傲當  
世而潔清想昔日之巍然廣殿兮對先聖以交榮如  
子路曾皙冉有公西華之侍坐兮垂紳端拱各控其  
素志之誠嗚呼余德至陋繆膺教職獲與柏而相值  
如親炙夫盛得講習之餘將迎之隙旣弗嗜於杯盤  
又兼忘於射奕必往來柏陰吟哦其側繇日月以居  
多豁聰明而有德其朝暮也藹瑞露以冥冥駐歸雲  
而凝碧其四時也謝群芳之爭妍憩薰風而暑釋飾  
蒼光之十分封雪霜而玉爍若乃瓊花兮一本芍藥

兮千畦蕙蘭馥郁乎亭檻錦綺焜煌乎塗泥上由刺  
史爰建黔黎咸擇地而置酒紛踵繼以車馳曾此柏  
之不顧兮其青青固自若也豈以此自少而遂衰及  
夫時運遄往木帝無爲驟雨滂泥以滌蕩狂飈奔騰  
而折摧昔蕃鮮兮何在今寂寞兮空枝使當年之好  
事慘搔首以興悲獨此柏之不變兮其青青固自若  
也亦豈以此自多而增奇嗚呼柏之所以爲柏兮其  
常德若茲僕幸得之而深兮勝老馬以爲師允蹈賢  
聖所期于學者死而後已兮肯以窮達異其毫釐庶  
幾無愧乎柏之常德兮不爲君子之棄而小人之歸



古詩

秋蠅

秋風快如刀着木木欲折蕃鮮轉淒淒入眼無一悅  
青蠅獨何爲飛鳴猶未滅造化本無私爾生亦偶竊  
念方三伏中日車午停轍下照人世間何異紅爐熱  
勁鳥倦戢翼猛獸喘吐舌惟人於此時體解劇疲商  
虛堂幸可逃枕簟隨意設好睡邊韶同素懶嵇康埒  
更此值清涼酣寢謂須決雙睫才欲交汗膚遭爾齧  
營營不絕聲宛類讒口吶使我寢不安欲息還復挈  
况如一簞貧未能萬錢歡園蔬薦脫粟杯盤殊滅裂  
雙筋才欲拈咀嚼遭爾餐適從何處來食飲汗脩潔  
使我味不甘欲嚙還復噎毆除付疲兵祇足增跛蹙  
宜哉孫權彈爲爾情激切期望秋風回一掃無餘孽  
偶此延朝昏勿謂風不烈氣候侵凝凜龍蛇且藏穴  
爾形大豆然豈能堅如鐵

書徐仲車先生詩集後

古人往矣名空存爾來冠帶誰其倫語言淵騫行跡  
躡俯仰不愧何續紛先生道義完且潔去彼取此非  
今人事親不但綵衣戲刻木省定長悲辛拋官却掃  
醉經史胸中寧復留纖塵履穿袍敝突不墨辭幣與



粟甘清貧自從秀髮到白首造次於是如一晨當知  
有吳憫澆散先生故出援斯民嗟余稟賦雖不敏管  
窺偶幸知所因講聞先生亦已久云爲輒以書諸紳  
竭來廣陵兩閱歲所得比舊尤加親此編推什數百  
計覃思成誦驚余神恍如聽樂周太廟黃鍾大呂皦  
且純又如典瑞出圭璧璀璨滿目非珉珉偉哉固足  
信萬一髮髯想見容彬彬吾皇圖治急遺逸空谷相  
望摧蒲輪先生高臥焉得遂細扎匪日頒嚴闥奈何  
韁鎖脫無計灑掃猶阻致此身願言師法不少懈庶  
幾有立逃湮淪

送李光道承事罷高郵酒官

豫章拂青冥密蔭覆百畝初由拱把微封植歲月久  
大厦搜棟梁匠者終見偶甘井如車輪千尋徹坤厚  
畚鍤非一朝致力自培塿河流涸生塵源源獨清瀏  
李子素綺紈操約世莫誘字畫尤勁奇往往過虞柳  
當其求帖時髣髴昔人嘔吾惟蜩翼知豈暇卹衆口  
願言舉斯心夙昔仁義藪甘井與豫章勿使擅所有

送樓謙中赴江州德化主簿

憶昨隨侍遊鄞川窮探欲上蒼崖顛崢嶸古寺忽邂逅  
眸子顧我驚瞭然子時苦古慘無意揮塵豈暇論



幽玄星離雨散已五載誰謂此地方周旋胸中突兀  
富經史欬唾落紙珠璣圓明明君王正側席何事版  
籍從拘攣匡廬勝槩半境內足以寄傲追前賢穿雲  
漱澗徧所歷妙句流落人間傳却來隱几北牕下博  
山深炷沉香煙細觀身世究竟處何者當好何當捐  
紛紛萬事付一笑聊復爾耳姑隨緣吁嗟二輪挽莫  
住願子於此同勉旃

贈茅山范道士

道人本是紅塵客曾把錐刀開胸臆一朝矯首看冥  
鴻棄子指妻人莫測三茅峯北華陽南凌亂煙霞闕

殊特築庵寄傲知幾年但見日月忙如織飢食落英  
飲沆瀣策杖溪雲隨降陟蟾輝倒射松風寒長嘯一  
聲山欲闢飄然行止信自由或到人間躡人迹朱門  
甕牖初不分遇酒輒傾論斗石有時巧發驚四筵季  
主猶慚多失策紛紛流俗爭稱奇豈識道人真所適  
茅君僊去空遺蹤高行三千當自積琴閒棋罷宰相  
過却恐鸞飛無處覓

送宋司理赴吏部

古木暗長堤清漣漲輕縠南風聒烏檣動子歸興速  
今日共一罇明朝各川陸我心久已灰慘愴輒眉蹙



鮑叔實我知嵇康亦子熟少年挺奇資綺麗誘莫逐  
抑首掾雄藩哀矜見推鞠季文每三思石慶懼譴戮  
多事如不勝投刀斯中族重華雖前旒疎逖無隱伏  
雜選登俊良能官真穢樸行看萬里塗追電恣騰蹴  
赫赫繼家聲勿忘勤聖讀

登召伯斗野亭用孫莘老韻寄秀老叅寥

廣陵最嘉處堂與南山平慨然寄遠矚溷濁爲冰清  
冷官從無徒猶阻窺朱甍矧茲斗野構名實久已傾  
距我逾一舍何由偕友生王事有邂逅川塗假新城  
登亭若爲慰飢渴甘大烹蓮花襲襟裾雙鶴唳且行

一笑發深省坐見星斗明回首莫逆交物外正采榮

寄樓謙中

三年客揚州鄙吝誰與晤美人海上來青眼獨余顧  
荒涼弔遺蹤每每叅杖屨敗意無俗物欣快平生遇  
陶丘今杜門習嬾殆成痼塵尾掛壁間琴書自朝暮  
匡山正倚天枕漱實幽趣清壯增筆力重規謫僊句  
相望越千里欸段不獲驅何當繼疇昔把手論情素  
惟有月下桐秋聲已如故

効十二屬體

區區鼯鼠技不優鼓刀要使無全牛力探虎穴必有



獲縱如兔窟焉能謀好龍既久乃龍至畫蛇添足豈  
蛇伴驄馬御史風烈在瘦羊博士聲名流棘端猶作  
刻猴用寶鼎忽患烹鷄求相狗他年會見賞牧豕海  
上非吾憂

感年

一世三十年我今二十九昔人當此時事業已不朽  
顏淵語心齋瞠若夫子後著錄盈三千獨居四科首  
荀彧王佐才智畧子房偶脫身作謀主談笑解紛糾  
元賓與習之二李相左右復命索玄微詞章配韓柳  
夙成更超倫初不愧黃耆項橐實可師仲尼安敢友

孔融登龍門元禮接彌厚叔度千頃陂能使荀淑忸  
陳蕃置一室誓絛天下垢賈誼入朝廷號咷動明后  
陸機文賦成見者咸歛手禰衡孰比俊帝室宜見受  
李賀錦囊中佳句敵瓊玖相望編簡上灼灼列星斗  
而我獨何人擬之一無有追惟故時事浹背汗如劉  
窮年坐井底曾不辨齋曰多岐既亡羊画虎欲類狗  
狂瀾儻不迴何以刷茲醜吁嗟歲律逝易於屈伸肘  
分陰所當惜來者勿復苟譬彼力田子耘鋤肯鹵莽  
所期嘉苗成不使亂於莠血氣况方剛龍鍾未為叟  
高名非我心沒齒庶無咎



荷澤 探得梅字

滔天洿水非凡災平地洶洶生風雷帝堯哀民作魚  
鼈咨禹平之時懋哉未暇雍容堂陸上和羹以爾爲  
鹽梅禹知休戚係予手汲汲豈獲憐嬰孩疏鑿高低  
捐四海校量勢力天須回爾時荷澤次第及導引一  
股從東來就中不獨豫州利八荒賴以川原開農桑  
處處酬願欲鳥獸蹄跡還蓬萊此澤雖微與有力揭  
之載籍懸星魁禹歸上天已萬祀遺利猶今分九垓  
帝里虎士不知數朝昏待哺張其顛轉輸粟布自東  
部浹日何啻浮千椀始知寸膠無足用安危須仗經  
綸才君不見黃河泛濫金堤摧糜費皇家幾億財華  
衣肉食皆妙選年年議論喧中臺

陶丘 得傍字

山河融結皆奇狀此丘之形誰與矧一成為敦再爲  
陶二帝昌時已詢訪至今禹貢名字存氣勢仍容荷  
澤傍普天率土此其中雜還舟車來四向分茅開國  
南面尊屢致千金謝齊相爾來日月幾春冬興廢相  
尋人物上紛紛萬事已塵埃此丘迤邐初無恙平生  
苦死嗜登臨准擬攜筇事踈放冷雲寒日滿荆榛藁  
爾令人重悽愴會須東走泰山巔縱日乾坤更何障



默坐有感

後悔寧可追稱誤豈容數試觀古來人何以為先覺  
一日三省躬此事在力學年光捷霜蹄我心羞齷齪  
次韻羅正之提刑見寄

天邊故人贈明月恍惚如臨滄海濶幾年塵尾阻清  
談一日中腸寬百結鍾君骨朽誰能琴流水高山猶  
到今平生宮徵愧伯牙邂逅夫子還知心相期端欲  
追前古諸事斯言逃責數青雲躬達豈須論廊廟由  
來齊子午子午乃谷名隱者所居見杜詩

王景亮攜鼎無咎清美堂記來求詩為賦此一

篇

先生不出二十年幅巾種樹老盧泉盧泉水木清且  
妍築堂流水茂樹間晁侯作記筆如椽回欄素壁青  
瑤鑄明珠白璧光射天先生矜詫喜欲顛春歸野岸  
綠漪連青山東缺如斷環雪消風軟山蒼然杏梢紅  
破臘脂寒先生醉狂夢思山自駕草車束塵編上堂  
讀書門書闥金徽朱絲弄猗蘭相思古人太古前若  
非豪士魯仲連即是幽人梁伯鸞先生好學老益堅  
少時不信功名艱青衫屢補鞞決穿晚知有命絕可  
伶歸來自買汶上田穉經香露凝秋殷只知留客有



酒錢肯問金粥寒齋酸拖金曳繡卷曉班何似布褐  
暖且寬先生所願一何廉貴人孰與先生賢朱門銅  
臭厨肉膾夜闌白月照管絃美人一笑天桃燃安知  
賢達死丘園正恐後世終無傳此意已輸先生先我  
今欲歸無由綠蕙帳依約聞清猿何時相從一醉眠  
梨花楊柳傍禁煙曾點浴沂春衣單德公渡沔應已  
還山中桂枝聊攀援

三朧亭

結構安在哉荒涼但郊藪無言對斜陽盧兒亦搔首  
唯餘舊時春年年暗榆柳棄置勿復論興衰古來有

成陽

茆茨土階不圖好想見游宮滋草草有時驚蹕從天  
來諄語應無路傍老可封之民紛萬邦豈獨茲城知  
所保穀林南畔今何如煙草茫茫車馬道

范蠡塚

山棲嘗膽時禍胎久已孕欲今蘇臺傾端俟天人應  
夫子實竒才大事力能勝中分句踐憂內外各宜稱  
一鼓雪前羞功名在乘興向非斷以獨未必還千乘  
荆棘梗寒宮晨朝露常疑可憐東門眼至此不得瞪  
烏喙鮮克終天道亦惡剩脫身海上來嘉言誰與贈



位高金更多所向豈躑躅况有絕代姿提攜充妾媵  
試看劔頭血何如窮絕磴由來進退間處之貴不惜  
孤墳忽生疑文獻良足證吳人未忘情高樓時一凭

恭王殿

昔人語君臣相須比弓矢乃若父子間至情非所擬  
惟王適帝心重以才藝美朝罷正臨軒墮丸未云已  
誰令羽翮摧高飛為中止揭來天宇東基構傍荷水  
靈光屹相望應陋苟完矣于今崇傳舍便是當時吐  
那知王者居日與行子帝悲風起庭槐颯颯盈雙耳

送交代榮子邕

類宮久戢身所造益了了慷慨揖古人百為無一矯  
就令力回天初不變忽眇璀璨文字間與此故相表  
服膺今十年邂逅辱繼紹遇我逾故交微言幾昏曉  
可憐不兩留行色逐飛鳥蓬山插青冥鬱鬱佳氣遶  
懷鈇謝風塵大用此其兆願子更勉旃真賢古來少

端午郊園

叔度久不見我心如亂茅良辰適端午萬事聊一拋  
策馬指圭竇同焉有神交森森千畝竹正爾清樂郊  
相與造其下香泉薦嘉肴高談落美玉逸氣騰長蛟  
徑就真樂處古音奏陶匏日車駐晴空木杪疑焚巢



何必蒲葵風脩然條惛惛茲遊信物外孰與娛雲鬢  
無端消息來主人隨鉦鏡會須更卜日城府方膠膠

送黃元明赴梁縣尉

豫章控江南山高水沄沄鍾此千里秀君家賢弟昆  
文采映諸父鸞鳳爭騰騫伯氏晚相遇許我遊其藩  
聰明置不用道術臻忘言晏然稠人中容貌白玉溫  
求之古君一端若李仲元一尉聊爾耳誰識君所存  
霜風慘黃葉雪雨埋朝暎柴車竟行哉我心憂聾昏

次韻醇中見寄

此身風中蓬飄飄落西豪穎昌有所向不膠漆杜明

天自高坐懷平生友皎皎眉間毫書隨鵲聲來厚我  
逾綈袍如何東楚鳴亦復追離騷彼蒼久已均後佚  
須先勞試看刀筆微他日猶蕭曹麴藥正多事要在  
舖其糟勿謂伯樂死轅下終竒毛况乃掣電中幾許  
堪遊遨展江涵清空春光集漁舸命駕裁數驛慰比  
心切切呂安何人斯君首無徒搔

韓園

春風挽我出邂逅陪友生濱湖足勝事繫馬聊班荆  
踈柳傲清淺孤芳媚晴明禽哢雜魚躍日轉無人行  
此間已深趣繼踵仍高情犀局自勝負玉軫誰戲成



道維集卷一  
盈罇不在飲會意時一頃豈減七賢游亦云四者并  
如何渺茫外忽起絲竹聲未暇從爾爲目斷陁山橫

送宋子發節推

富貴如烈火銷鑠誰爲鋼黃金攫清旦一視無四旁  
夫子真璞玉炎炎詎能傷萬事有矩規豈與時低昂  
五十猶幕府鬢髮初不霜天眼終自清彈冠指明光  
卿雲澹朝日舞蹈縈爐香勿憂雨露隔二聖方當陽  
大器故晚成此去未易量巾車難更軻潁水徒湯湯

次韻崔德符遊湖

無雙藹嘉譽夫子真黃香磔硤傲松檜人間自炎涼

平生翰墨中赤增戲蕭娘古詩有穎川今何時鼓翼端

來翔西湖謝塵土危樓更斜陽幽期得高士一笑歌

滄浪新詩落圭壁豈異連城償胡爲獨韉鑠不作逢

瀟湘杖屨行清秋從容酬所望

道鄉先生鄒忠公文集卷之一



道鄉先生鄒忠公文集卷之二

古詩

次韻德符湖光亭之什

平湖泛日月清光渺無端  
并包入眼界危構何軒軒  
輪蹄隘行路逸步誰與攀  
只應空曠中縹緲飛神僊  
我心本虛室朝市成青山  
居然發餘照妙用同一天  
凭欄豈無人杯盤爭擊鮮

簡德符

清標貌冰壺一見滌袪暑  
况乃北牕風窮辰薦佳語  
鄭轂正喧天忽此聞祝  
敌坐令偕生疾不待砭石去



我愚雖絕人志氣肯爲鼠如何城下盟欣然爲君舉  
請看時雨來潤澤先柱礎豈無力使然默感自難阻  
高堂久懸榻寶劍已心許昨宵共燈光今作叅商處  
秋意入梧桐滴瀝開東序連牆莫至前念君初逆旅  
蛇影勿狐疑當思啖齋杵桑蓬元四方事業在伊呂  
匪石詎可轉紛紛任兒女但願蚤晴明交臂無齟齬  
更約靖節君相與富毫楮朝昏經史間端如殖禾黍  
他年羊子妻焉能斷機杼君席果不分我知逃爾汝

用王憲韻寄叅寥

天資不紛華脫身禮白足一笑語曹溪與世作眼目

有時戲毛穎新詩奴鄭谷翹首百家中疎煙澹脩竹  
頃年古招提山清水澄淥傾蓋揖孤標令人慙逐逐  
平生稻梁謀從此在鴻鵠爾來落高陽轅下方局促  
况乃建隆師黃壚已埋玉豈必阮步兵途窮泫然哭  
賴君金石聲丁寧鴈飛速我心端何如盲龜得浮木  
遙聞玉堂老初情敦夏屋支遁久埃塵風流一朝續  
營營覆載間萬事風前燭願言掃雲牕聊對傳燈錄

送張舜諧遊上庠

高木紛萬狀皆從豪末來天時與人事相資以爲媒  
根本初不同它時終異材東風動霄壤繁華媚池臺



花枝竟無言車馬爭徘徊霜雪一朝怒孰與松柏陪  
青青幾千尺寒峯正崔魏向來絲竹處索寞空塵埃  
明堂屹南面梁棟支傾摧匠石有青眼肯爲桃李開  
窮年後悔心何似今日回

穎橋僧舍壁間有詩頗怨不遇因以次其韻刺  
之

食肝何必馬食魚何必魴趣操苟冰炭誰能屈鄒陽  
人間所榮觀金門與玉堂患失紛鄙夫白首猶悵悵  
豈識君子心草衣如繡裳數澤方爵羅鷓鴣已翱翔  
路傍草

洪造初無私物生自殊異叢叢路傍草枝葉一何悴  
行人或陵踐牛羊肆殘毀縱能勝疾風厥害還遭值  
瞻彼山中蘭孤芳常茂遂馨香動君子采擷遠而至  
須知得失間所托惟其地嗚呼儒衣冠如何不尚志

午枕有感

宰我嗜晝寢邊韶仍愛眠當時師弟子指責良紛然  
韋絃以爲戒僂俛亦有年分作蠹書魚文字相周旋  
縱不叔夜懶猶慙頭在懸如何到此地午枕猶所便  
晨食未停筋睡思潛予牽矇矓眼自醉百體柔於絲  
茗飲雖再三驅逐無由緣解衣臥北牕徑走姬旦前



道集卷三  
往往隨物化飛躍參魚鳶老木森古砌日轉驚鳴蟬  
矍然整巾履衙鼓忽已傳由來棘園中疎放成拘攣  
氣血似止水鬱鬱爲此愆何當徹門牡四顧還青天  
朝昏遞消息有節亦有宣焚膏續清晝冥心寄韋編  
往失固莫救尚得來者全聖處幾萬里行矣勤着鞭  
次韻鄧州范仲成秘校見寄

落筆文章真宋玉八面從橫欺炙轂潛藏頭角臥南  
陽朋足豈是王駘辱每嗟愚賈謾操金他日辛勤只  
書簾丈夫事業會驚人誰知范叔成張祿相逢憐我  
再齋盍不羨高門厭梁肉追惟吳國舊時縱山澹晴  
煙水輸淥幾年嵇阮作參商漠漠茂林空自竹懽然  
一笑換淒涼端遇牛公容杜牧爾來日月更中天未  
應寂寞食秋菊

用前韻寄鄧帥杜君章學士

策府名卿厭鳴玉搗來南陽朱兩轂胸中雲夢吞八  
九終然不貯閒榮辱坐令政事邈前人容易端如探  
筐簾去年持刃今扶犁所至熙熙豐穀祿華堂夢斷  
燕絲簧笑謂鄒枚不如肉公雖飲少客自醉但見銀  
餅倒輕淥明明天子正搜賢真賢繼踵還符竹勳榮  
矧已疏屏風八命難淹一州牧願公快向百花洲更



集賓僚勤把菊

用前韻寄穰城謝公靜推官

邂逅蒹葭來倚玉淺見慙如視車轂荷君傾倒過平生妙處令人忘寵辱并包今古入靈臺欬唾珠璣幾盈麓紛紛年少多公卿何獨斯人猶寸祿南陽刺史今伯樂歎息龍媒異凡肉刻章求以助風流豈減紅蓮汎澄淥更將餘力付蟠根迎刃無留真破竹才全如此帝未知燕閒却自思頗牧東山出處是家風莫學淵明戀松菊公靜屢言非晚歸休范仲成約非晚過穎昌留數日因鄧兵還追用

前韻寄之

勿歎卞和猶抱玉勿嘲楊雄未丹轂由來識拔須待時阨窮不是男兒辱相逢相別竟忽忽賴有好詩藏敝簾居然成誦想英標殺馬無因愧持祿還家青鏡覽形容鞍上豈徒消髀肉故人要我泛西湖萬頃彌漫漫天淥坐中寂寞欠車公只應冒雪歌黃竹從今塵榻掃南牕日俟高車起耕牧懸知樂事與衆分把殘追論燈下菊

與王仲弓分韻得東字

西豪星聚時有客還頻宮解驂聽揮塵落落凌霜風



平子素我厚繆入題品中夷甫不復言目繫心已同  
頃篋競遠韻欣逢吾道東平生仰高山鵠立拘樊籠  
誰令燕雀微一旦追冥鴻明珠繼來投照夜驚兒童  
從今日虛徐所冀資磨礱只恐天池鯤朝夕搏晴空

次韻仲弓見贈

我生分稽古未始懷宴安萬事不入眼人間自悲懽  
獨於文會時所取良必端起廢賴發藥他年逃素飡  
蘇君日千里逸步逾飛翰一從斷金來况也寧永歎  
于今更天誘還逢魯圓冠傾蓋如舊識禮法能見寬  
須知高門中階庭富芝蘭何獨仲弓家弟兄稱二難

琴張誠可友願言謝外觀聖域渺無旁觀水須觀瀾

送裴仲孺攝汝陰尉

我讀醉翁思穎詩恨不六翮西南飛類宮竭來濱穎  
水穎水雖同非穎尾羨君匹馬秋風前吏隱去作南  
昌仙霜威凜凜肅普天環湖瀟灑皆當午時豐鏡鼓  
如寒蟬想見絲緡上釣船太白還光醉翁死鄰家仍  
無隱君子山高水深誰與知只恐未樂君先悲朱方  
豪士森戈矛青雲蹭蹬猶督郵不如黃雞白酒相與  
醉即休

次韻世美遊嵩山



肇分五嶽尊上帝委竒石維嵩據地中屹立萬仞壁  
遠與四鎮殊式應土圭測有人仰崇高坐厭拘名跡  
邂逅天際來驂騑脫車輓將聖祭泰山此心豈懸隔  
擾擾塵土中一朝復一夕聞君有風期欣然雙蠟爇  
焉知馬足非迥隔千峯碧古人亦多端相望託幽寂  
法音動山靈松栝惟所適寄徑登顯途自恃捷無敵  
遺轍諒未泯一一可遊歷借問去來人誰堪比心迹

送崔子厚朝散倅安州

君家如武庫人物常森森伯氏妙難測一笑冥古今  
蒲團與藜杖終然作知音王事挽以去歲杪霜雪侵  
輕軒奉白髮遙指甌山岑臣子難有已忠孝亦已深  
南方擁兵刃調發多呻吟使民還繫壤屏星實分任  
况乃功業本從來在無心獨恨鑠天北誰與同瑤琴

次韻仲弓見懷

與子風雨散掩關非世喧琴書到古人危坐屢忘言  
何當同此趣脫畧文物繫歲晏猶清居厲節真王尊

悼陳生

鄞川進士陳生者失其名字頃赴舉開

行十舟一日前舟逆遇暴風覆溺殆盡獨陳生  
所寄舟回帆轉舵隨風以往已而陳生乃獲遊  
古天宮院蓬萊峯浸久思歸就試天宮人固留  
之莫能奪比歸則妻孥之墓木且扶矣皇皇里  
閭問追惟昨者所接始悟其風塵表也復欲從  
之而不可得遂病狂以死唐城令建安章洛顯



父語其事故作此  
詩備他日寓目云

豪商破浪隨東風舳舻相繼滄溟中回環極目渺無  
際萬石之載載飄蓬一朝六鷁不得進十舟八九成  
虛空一舟邂逅脫魚腹開帆豈暇論西東大明出沒  
夜復旦何許清越鳴晨鐘舟人側耳正驚喜忽瞻水  
際排竒峯落帆沉碇泊古岸介然荒徑雲間通鄞川  
書生託舟尾見之踴躍追猿狖扶疎恠木進十里突  
兀古院題天宮入門長廊轉寂寂堂上高拱龐眉翁  
左右侍立滿三百談玄演義聲玲瓏相逢問勞憫流  
落旋啓虛室棲行縱紛紛袍布欺臘雪獨此錦帳朝

霞紅黃金白玉薦豐饌樂苗蔬甲青茸茸主翁自言  
避巢寇竭來不與中原同于今天子果誰氏語罷默  
默如盲聾日遣二子共遊處因得細詰開冥蒙皆云  
我輩號處士名字非列神仙宗三等三百奉一主上  
等第一裴休公提攜峻陟幾千丈笑秦亭上聊從容  
秦皇可笑笑不已轂撼亭角摧穹隆徐福曼倩亦何  
在前後石壁猶房櫳舉頭指似蓬萊島霜雪直上磨  
蒼穹波濤作勢撞山脚曾有神聖躬磨礧欲令異物  
知所畏周遭水面盤蛟龍書生名利淡肌骨塵念日  
久生心胸老翁照見輒微笑血盆再入空易攻蓬萊



有路爾常覩此別曠劫無由逢吾今舟楫助爾往爾  
其登覽怨可窮日輪迎曉傍山出水聲先沸驚豐隆  
赤光合散動天地頃刻氣候分春冬高低殿閣屹相  
向一一鐫鑿非人工窮晨不復值仙子卿雲端霧空  
蒙龍詢之處士益有謂近世人迹幾相重鸞駮鶴馭  
厭凡肉矯然遠舉歸鴻濛先生呂翁獨於此一年三  
四眠松風書生塵念竟不斷主翁但問何所供人參  
如人更長大願乞數本扶疲癯翁言此物有神護特  
經海道須雁凶良金美玉亦至寶爾誠欲之吾嘗  
告豈一事尤戒臥語詳初終楞嚴秘密偈四

句奉以周旋宜恪恭書生再拜起沉疴轉眄已入鄞  
州封還家妻子久黃壤單形隻影反忽忽却思投翁  
事清淨天南天北惟飛鴻茫然進退真捕景一生顛  
倒終狂童君不見秦皇漢武操利勢自許神仙力能  
致海邊方士日從橫畢竟千非無一是書生徑步蓬  
萊巔况乃天人勤指示若爲名宦苦死堅失脚青雲  
墜平地僊兮僊兮一何異求不求兮兩莫遂我雖忘  
情亦歔歔仲尼之門非所議率然作詩紀其事

次韻世美冬夜見懷

君家儒學頻公侯豈如孔孟窮於鄒宅年事業知未



艾洗洗孫子多清流紅蓮上客更超詣勁節耻與今  
人儔自言名宦亦何有回看家法長包羞蕪城歲月  
已波逝竭來文會消吾憂青天白日有崔子亦許交  
臂聞嘉謀人生南北那可必合散倏忽春雲浮會須  
着鞭入聖域無使後悔空冥搜

送德符還陽翟并簡陳叔易

霜嚴識蒼柏火烈知黃金不有小人謗孰窺君子心  
前程已如此紛紛矧于今衡門杜朝夕巧舌猶追尋  
一與接爲構何以逃交侵任大始多事由來天意深  
北風動清夜興落西山岑逸駕豈受挽耿耿聊分襟

太丘阻眉宇爲我先寄音漁父可師否茲焉共浮沉

烹密雲龍

君不見子建七步俄一詩太冲十年僅三賦相去何  
啻楚與越爾來題品皆才具我生尚友到古人袖手  
寒牕重慙懼巧遲拙速非所長舟沂湍流只如故秋  
風逸思誰肯分惟資茗飲祛昏瞶人間氣味足奇功  
畢竟不能成好句集仙公子天上回拭目元豐新制  
度夜光明月豈足珍矯矯真龍醫雲霧潛藏飛躍自  
有時只恐緘滕終不固况聞醉翁歸潁東更號六一  
逃機務震霆端的助滂沱名稱恰應當年數從今掩



卷待青禽晴軒屑玉和甘露胸中無復舊塵埃五物  
狂吟在朝暮須知料虎威自貽莫譏惡客居家蠹

次韻蘇子駿寄其弟世美

霜風戰蕪城耿耿袖間手我冠何許來逸氣蟠九有  
入眼無可人終焉收下走舌端寫天河那知膽非斗  
離亭巧梯媒節物幾榆柳所向曹叵阿剛腸欲雷吼  
飢寒挽柴車莫獲親可否年來但韋編妙處知不朽  
規模綿古今元自一布肘翛然環堵中未覺羲皇久  
三復鵲鴿詩亦已等妍醜此心千里同豈愧鼻如口  
更聞隱君子隨風落巖藪崇朝公事休嗜好斥杯酒

幅巾款玄談聰明謝天誘萬象懸目前軒豁開戶牖  
坐令黃堂上觀淨亦成垢維皇急親賢承庸拔師友  
丘壑難自娛巖廊拱文母只恐行賜環仙去誤雞狗  
與其羨長生孰若壽黔首一語君試聽黃梅未當割  
靖節堂分題得重字

儒衣隘綿區冰炭非一種邂逅心事同清標揖孤從  
駕言仁義涂相與戒前從廓廓膺肺間何由納天寵  
春風入高堂文字競拳勇妙句窺杜陵微語傾叔重  
翹然真四夔吾道有扶擁遂令斥鷃姿端為鍾鼓悚  
從今日喧妍勝處宜接踵獨恨韓城君伶俜泣新壠



次韻崔光先見簡作詩催春色

春遊有客忘朝暮，酷似經星好風雨。豈知仲蔚長蓬蒿，寂寂儒宮栽一畝。新詩故委黃耳來，舌在驚疑爲頻吐。鴻鈞密運掃鞞蹤，萬物終然歸鼓舞。去年枯槁欲樵蘇，今已蕃鮮媚農圃。我家吹律信參天，苗裔非才闕無覩。族寒官冷自離奇，安能仰贊媯王補廟堂。燮理皆少年，佇見囊金罄花塢。

送幼安赴潭倉

人生本逆旅行止，良悠悠試看康莊。上轍跡多成溝壑，公子分閉戶來時亦何由。或書晚過春令方如秋。

河濱古城府稅鞅，聊優游青雲捷徑在。氏庾非君優臧孫，故有後斬斬承風流。故爲重作惡日暮，猶登樓。

仲孺烹密雲龍得烹字

清都密雲龍，遐方久馳名。無因飲天賜，歎息非公卿。爾來斗牛間，瑞氣蟠縱橫。龜書識至寶，近在壁假城。物色到君篋，發視凡骨驚。君心本鐵石，從此亦變更。自言匹夫耳，乃有懷玉聲。群嘲杜潛隙，徑約良友烹。伊予豈其人，重以慰平生。可憐謝康樂，新詩徒爾鳴。

謝公詩書作詩督烹之無効

鮮于大受輓軒



斷輪知讀書解牛得養生天下一致耳冰泮無餘情  
向來所筮蹄俄已蜩甲輕豈必吟澤畔始爲當世清  
魯堂殆庶幾居然黜聰明蠢蠢冠履間胸中妙難名  
鼓鑄雖有自竟脫模範成詩翁旣遷去委蛻今韓城  
閉門作龍螭端俟風雷驚文史聊寄徑與古將抗衡  
何以識此心標榜輝前楹它年付卷舒會員見推善鳴  
應憐劉季陵寂寞初無聲

送鄭祭酒得宮觀還鄉代至虛

閩中男子多儒衣龍驤虎視惟四夔門前蓬藿老風  
雨籍籍聲名天下馳爾來半作古人去亦成霜鬢甘

伏雌獨隨日月上星斗即今先生侍丹墀先生胸次  
真武庫無所不有世莫窺蚤年剖符勤撫字晚年賜  
環妙論思朝廷遠覽得治本務先長育英豪姿凌雲  
大厦豈一木要在鉅細皆其宜先生彬彬揭模楷仰  
膺帝可端爲師鸞飛鳳舉徧臺閣辟雍祭酒終不移  
下帷莊坐對沈燎諸生自耻專浮詞斯文與天共澄  
霽肅駕聖域無多岐它時合抱挽梁棟論功較德誰  
高卑先生胡不長風憲豺狼在念略狐狸坐令飲恨  
發深喜簪纓無復藏姦欺先生胡不司翰墨形容堯  
仁曉天涯魯宮典誥從此復大哉王言非寄私先生



胡不秉樞極以道揆事如著龜河防民役有定論簡  
拔賢俊祛嫌疑吏員一一底乃績二虜拜手受指搗  
東西南北幾萬里匹夫匹婦違寒飢人言太平亦無  
象但見父老同兒嬉胡爲五湖入清夢忽焉幽興落  
武夷千鈞一發誰挽得徑約赤松歌紫芝長安車馬  
競回首頗似巨源辭位時通德高門想如昨溪風旦  
暮猶有期冷然杖屨遠俗物此心惟許江鷗知魏魏  
北辰拱天子還淳直欲躋皇義人才未登常側席鶴  
書每每空山茨金甌况復舊名氏只恐先生難自怡  
元魯侍親還以凡今之人莫如兄弟賦詩送之

弁示至  
遠至虛

秋風卷輕帷似送東歸帆親心爲惻惻穀馬馳兩銜  
吳江渺清泠吳山鬱嶢巖侍行不爾俱官曹猶治凡

又

北出青山門宰木行森森吾祖不可見歲月成古今  
侍親奠鷄酒應慰久客心爾心故自慰爾兄涕沾襟

又

爾生見天地較我兩歲遲兒童作壯夫恍若旦暮期  
詩禮久服膺飛鳴當及時春勿醉鄉去志士良耻之  
又



姑蘇一都會井徑分龍鱗風俗如鄆城臧否朝朝新  
况爾隨侍子動與嫌疑隣延篤儻可師不如陪古人

又

至遠挽不來庭竹屢隕籜剖魚得素書頗說甘寂寞  
矯枉勿過正執中思子莫它年同我心俯仰無愧忤

又

至虛走喬門所樂在群居群居固可樂它正亦紛如  
合抱自毫末要須脊其初大帶有餘否此語當急書

又

詹何我師友詹拊何天發文行懸高名天命豈易度棲遲

尚柴荆省定餘白晝相與發大鳴才進非故吾從此  
難為兄

又

四人如四支闕一不成體故為各天涯阻異晨昏禮  
但願器業成高陽亦兄弟此意何肯窮潁川方瀰瀰  
次韻德符夜訪世美

蘇子甫及瓜裝齋動簷楹念此不數見柴門行書局  
幅巾策藜杖邂逅諸友生涼月委新照無煩聚飛螢  
懽然造空洞卻願輕簪纓虀鹽未果腹飽德如楚萍  
只應它夕來翹首心盈盈



次韻樗年見簡

一身能幾何首尾復自畏豈知塵表姿落落惟所值  
官攤忽相逢欣悲十年事須知襲人間舒卷在母意  
它時况英聲曾冠通侯次行矣方坦途真賢不難繼  
用前韻寄鄉中諸長者

鄉邦藹儒冠後生良可畏况乃領袖賢疑與古人值  
爾來索吾居南北幾歲事冥鴻雲外心疲馬風前意  
遙知松菊間青編煥鱗次何當返柴車故步懽然繼

道鄉先生鄒忠公文集卷之二

道鄉先生鄒忠公文集卷之三

古詩

次韻德符過曾園

東方澹殘星車馬各有之心落聲利間搖搖無靜時  
幽人獨朝徹蟾光濯漣漪賦詩鷗鷺邊妙絕中郎詞  
青眸正相嚮白駒忽已馳歸來過我談聞風徒振衣

又

數子清玉峙粲粲凌朝輝持竿謝高風鉢囊聊自攜  
豈不一趣尚因緣非兔絲北去得幽圃相與無町畦  
白鳥亦忘我共此天然姿只應太史奏還在潁水涯



九原審難作幸及同襟期

次韻仲孺見督烹小團

世事多好還往躅端可視峯巖輝奇功頗愧文王肆  
它年焚舟來幾作塗炭墜駟馬豈及追我今亦如是  
狂言編虎鬚得報逾指鼻平生儲春芽美惡初一意  
濁氣騰墨雲君舌故歷試小龍落几前畢竟不知異  
方欲事烹煎薑盞以爲使蜀人煎茶之法如此賴君呼回頭絲  
桐識秋思會當掃南軒石銚沃清泚從此師金人三  
緘誠有味

再酬仲孺

龍團方啓封數子已驚視端如肖壁人騎羊入城肆  
又如金谷姿不合樓前墜囊衣本酸寒茶具無一是  
紛紛詰隣家浪欲學擁鼻秋空輒雲雷秘惜乃天意  
未敢還巾車且集諸生試豈非今年芽歲月與君異  
直須如印刊詩驛趼來使念君才患多落筆有餘思  
盈編故可期河流幾肯泚君應嘲馬肝不食亦知味  
仲孺督烹小團旣而非真物也悵然次韻以謝  
不敏

情僞初難分飽聞不如視君看求馬肯安得走唐肆  
此茶亦先聲入手恐失墜冷然風御還共飲乃非是



坐令竹邊心追悔如刻鼻故人豈欺予姑以將遠意  
由來毀譽間夫子猶必試八牀志多金龍斷何足異  
胡爲不三思取信輜軒使超超莆陽公銓量妙清思  
仰止一喟然背決欲流泚尚賴君詩存高吟忘肉味

戲世美

楊家絕藝十六絃公卿往往趨賓筵妙齡才子更豪  
酌月中醉倒西湖船楚宮殘夢幾春曉五陵好事猶  
喧傳只今展江嘗託足香風帶恨留苔錢誰令故人  
不它寓榻來亭上仍秋天幽花脉脉鑑清湫似與當  
日爭蚩妍此心如水亦滉漾那堪鐸撥還鏘然譁騶  
夜半解歸鐙青燈炯炯空韋編砧聲漁唱起何許坐  
久波面生寒煙故應鷗鷺有深意忽焉鼓翅鳴牕前

十六夜府會湖光亭呈世美

使君終宴先歸休菱盤藻帶妨移舟湖邊何處月已  
到觀音堂下寒光浮鼎來談笑託新興沉沉萬籟乾  
坤幽雲端飛翼弄清靄波間戲鬣吹輕漚涼飈襲塵  
了無迹似動不動蒹葭洲却觀落日倚欄處天東縹  
緲橫高樓不須要月共形影吾曹茲焉成獻酬單衣  
盈露坐忘返亦忘佳客相與留始知人世惡塵土生  
平今夕方中秋昨宵蓮社二三子借問賞心如此不



道維集卷三  
三  
次韻德符訪世美

秋晨飯香積舉袂清風生  
揭來展江道老木森森亭  
纖埃不隨步昨宵寒露零  
人境兩相值簡編煥新晴  
遷固久黃壤椽筆窺群英  
崔子獨異趣一笑鈇槩輕  
詩成似金籥為我開塵局

敬讀仁祖實錄用前韻

嘉祐紀庚子犬馬初冬生  
安知拱堯舜不事沉香亭  
爾來百寮底霏霏清涕零  
弓劍誰與問白雲飛晚晴  
恭聞語乾造凜如班集英  
遺恩泰山重死報鴻毛輕  
聖孫王纂承行當叩天扃

送杜君章學士赴闕

西風獵獵鳴旌旗南陽學士趨丹墀  
南陽父老挽不住家聲復如東漢  
肯堂堂材具中梁棟鬢邊寒暑驚  
駒馳垂衣繼照揭日月只應一見舒  
堯眉鸞臺鳳閣有新路着鞭寧許駑  
駘知委身報國一心耳聾如嵩岱  
誰能移它時廷尉妙生死還將此道  
供論思凌雲大廈肅天宇千秋萬歲  
無傾欹焦頭爛額豈足尚長堤蟻穴  
今圖之回看蹇淺丈夫子攫金清旦方  
沈迷矢來無鄉亦可卹付與公議分高  
卑前人得失煥清簡納公胸次無子遺  
願言朝退坐華省更以反已為



元龜儒冠往往喙三尺勿令白玉生瑕疵

世美歸侍政府以送君南浦傷如之何作詩送之

汎汎蓮花池日月幾賓送乳燕辭故窠征途亦飛輕  
會合安可常萬事驚殘夢何以寬我愁風流在民衆

又

妙年公卿子可人逢此君退然數尺耳氣節凌青雲  
從今奉親暇簡策陪朝曛應憐四傑流勤勤但空文

又

巖廊拱真人妙與天地參政教似寒暑豈非樵夫談

木鐸久不振相府方潭潭公子飽見聞歸獻北斗南

又

忠孝非兩心事君如事父事君貴以人事父孰爲愈  
真賢絕驛騮骨相未易取願子繼法真母令老江浦

又

前年可羅雀朱轡出濠梁今年可炙手袞衣登廟堂  
公家本金玉何曾變炎涼公子不展眉端爲斯人傷

又

卞氏稱六龍公家宛相如久作風雨散于今共詩書  
山前猶製錦江上方題輿遙想侍側心夙夕鴈與魚



又

猶子知幾人子獨欣白眉風霆破春曉怒翼鳴天池  
未促南昌行還爲竹間期儻及馬伏波一書重示之

又

蕪城北霜雪潁川凋芟荷昔別情已矣今別情奈何  
英英二三子行亦車懸輜後日知誰同蟬聲猶暮多

送杜堪才以江漢故人少爲韻

與君本南北作吏同一邦詩書雅相好旨酒空盈缸  
歲晏賦歸去冉冉車輪雙我亦非匏瓜茲焉念松江  
又

杜陵世多人風流自唐漢振衣入朝廷玉立爭璀璨  
若人獨何爲轅下尚羈絆舌在且加飡慎勿發長歎

又

秋來幾何時送遠驚已屢山川澹無情蒼莽亦非故  
分與人迹踈韋編對香霧只應知此心西陂有鷗鷺

又

青衫勿自少委質皆王臣貴賤物外耳直道惟其人  
下惠信先覺到今如北辰居閒儻未能君志終當伸

又

漢水方涸流梁園政秋杪駕言托朝昏陳人有臺沼



它年李杜來慷慨識者少安得從君遊一笑今古了

馬叔寶寄種竹詩次其韻

窮年不揮斤歎息無妙質誰知深眇中環堵以爲室  
紛華如萬牛力挽未曾出論交餘此君聊爲拂巾櫛  
人間方好竿蕭蕭乃鳴瑟茲焉得所投陳雷信難匹  
昨來面墻心舉倡有風日莫似白樂天殷勤在兜率

雪中對竹

飛雪一何情拜我南軒竹駢頭控於地默默喻信宿  
寒花本輕楊叢集乃折軸况此梢雲姿蕭然異凡木  
飄風亦狂生端來助陵蹴似欲揉直柯繞指惟所欲

焉知天與剛初不愧幽獨罄折雖爾爲且異望塵辱  
晨光破沉陰春色盈兩目風雪安在哉竹猶故時玉

次韻韓君表雪中感懷

龍衣不解顏憂民向來急天高委真符年豐兆原隰  
連山水氣昏過雲鴈聲澁先春凌馬奔投隙作塵入  
瀕竹乍蕭蕭驚風還汲汲頗輕花鬪狂肯共雨爭濕  
夜半回曉光木杪森鵠立開編適吾心鼓枻輟清集  
一飽儻可償萬事非所及想見秋稼前腰鎌荷青笠  
用前韻寄德符

叩門無季心爾來空緩急若人作枯蓬隨風落遙隰



袖書珠玉昏匣劍蛟龍澁雪花凌春揚山寒擁扉入  
孤松初自高短綆豈易汲伊予不逢年所嚮驚東濕  
分攜忽歲遷結念成骨立蕭蕭清溟濱冉冉白鷗集  
盟好何當尋瓜昔亦云及東遊儻未忘鱸邊一漁笠  
德符頃有伯鸞  
下吳越之句

次韻仲孺夢與世美諸友同集

簞食淒窮閭綵衣煥華屋公子謝群居幾見羊胛熟  
逢迎紛故人趣異終疑獨精誠洞虛無相應如比竹  
不羨春風前流鶯囀喬木勤勤通昔心全勝書一束  
胡然亦神遊邂逅同夢鹿夜旦環中來夢覺更主僕

只今所見聞轉首驚莫復冰釋儻未能茲焉良可燭

次韻和韓大資湖光亭對雪之什

巖廊未旋歸故國聊自晦塵表澹崧高胸中妙天對  
豐年隨政還嘉雪徧境內從容陟九層指顧紛百態  
經綸動初心枯槁入長嘒雖陳北海樽終念東臯耒  
口應沙路乾依前符帝賚

送曾仲敷赴慶州司戶

棲遲潁水無三年四見長途事鞍馬問君胡為樂驅  
馳告我吾非苟然者向來庭闈故當爾今乃從知古  
塞下男兒出腹在四方齷齪南牕吾未暇隻手扛鼎



非吾力百步穿楊非吾射眇然軀幹僅數尺智畧豈  
分子房亞詩書禮樂工作謀元帥軒軒更儒雅相知  
不與今人同往來其藩躡如也君言慷慨得我驚我  
有私憂爲君寫魏魏法座天中央萬物生成得陶冶  
邊塵吹風不見人麟鳳猶阻遊郊野煩將此意問元  
帥何當鐵甲懸高架君家一唯如雷霆震動乾坤失  
聾啞願回盧阜異昔心白刃前頭薦瀟灑家風歛從  
千古還上策酬恩真土苴口終拂袖兩無言目送飛  
鴻不知夜

次韻仲孺見懷十二韻

江梅飛故枝桃李日夕更宰物初無心芳菲自奔競  
幽禽銜真如歷歷喚不醒東里似得之與春忘謁請  
頽然遽廬中槃薄天地永交情海漚發吟興秋翻勁  
璀璨十二旒陶謝不獲騁須知雲氣蒸未害山石硬  
但君已追風顧我猶蹇乘試馮作詩光普照萬物盛  
物盡照亦空何許開絕景它時從此來一眄蠟千聖

次韻世美見寄

鼻端漫故蠅心與天地遠聲容天地前長似西湖晚  
判合亦何常從古車輪轉君不見儒衣壞壞趨白頭  
幾人管鮑情相收我豈季子難之鄒行矣同聽黃栗



留

與仲孺破兔餅色味皆惡同一絕倒既而述之  
又烹小團亦兔餅也作詩報世美

爭攜懃意烹春風終焉臧穀同一蹤莫言不落第二  
月須知所好非真龍竊香安得青瑣趣効贖頗慙西  
子容此言雖小有大喻馮君轉達禪時雍

與仲孺文仲述之作詩送仲弓赴藉田以之子  
于征爲韻分得子字

鳳園佳人孤鳳起草木無光春披靡紅亭碧沼政高  
深借問何由駐雙履王涂開泰日月中玉堂仙翁是

知已瀛洲蓬島未橫飛且向籍田聊爾耳北道仲容  
休說貧東山太白誰比擬雲汀荷芰供遠涼遶砌青  
青更蘭芷丞相上馬臺閣空長鞭往往城南指君身  
雖不作羊羶自然塵表門如蟻清談秀句得豪英合  
抱它年鬱松梓要須萬口一同聲文恪風流今有子  
次韻劉元因贈王幼安

真人拱南響郡英紛玉除趨趨動環海夙懷思遠摠  
爭彈冠上塵丘壑空故居之子建安裔少長惟詩書  
每笑靖節君歸來但巾車擬倍萬乘器璨璨雕璠璣  
終然怒劔橫銳氣埋憂虞須知夢境中所適難一如



儻不達本原觸事成自誣試焚定慧香矯首瞻六銖  
於此發深省鼓瑟猶吹竽

次韻錢濟明訪定力僧及寄吳行古三首

門前朝市喧門內山谷寂昨來百慮心到此了無迹  
况復有高僧烟烟雙眼碧渠今未易親拄杖鳴百尺  
知君從之遊勤我遙相憶安得雙樹傍題名拂塵壁

僕元豐中寓寺舍  
累月題名壁門

又

北闕來新榮南溪抱初寂二子非世交窮通偶殊迹  
詩書寄平生孤雲卷晴碧遙遙天一涯回首無咫尺

伊予亦鄉邦豈敢煩記憶尚誤分隨珠宵光洞牆壁  
又

萬物遞先死憧憧嘗未寂中有不動尊隨方示形迹  
巨海何曾波長天自來碧誰令失坦途認此軀七尺  
空華初無根欣厭浪思憶君今儻回光奚須鑿隣壁

寄題孔先生行歌亭

仁皇御宇作太平朝廷玉立森賢英巖耕溪釣日寂  
寔何獨先生歌泚城遭世不比徐孺子設心不愧司  
馬承唐虞垂拱豈不盛巢由亦自非公卿冥冥三聖  
妙相遇六爻一半曾吞并倏遺像數入天籟無聲之



中端有聲有時鼓腹散秋步有時擊壤舒春情它年  
野叟得不盡獨與杖屨同縱橫故知造物有深意鳳  
凰來儀治功成鳳凰飛去定難久直使先生爲鳳鳴  
先生道德初不死先生歌聲猶可聽微風淅瀝動草  
木幽禽上下喧陰晴可憐雙耳不到此龍山滄水空  
危亭

送文仲省親

曾參愛孝通神明樂正子春遊其門下堂傷足不忍  
出流光至今覃後昆阿文全似李令伯更相爲命母  
與孫母年可懼髮委雪諸父駢頭埋九原淮山之陽  
歸未得飲啜無以供晨昏脫身來寄豈獲已方寸搖  
搖旌旆翻飛雲入望且還岫况乃凱風吹棘薪白水  
眞水挽不住却垂故索馳京塵皇天后土誠君意如  
君勿憂長賤貧

賦義皇上人分韻得風字

妙達萬物祖天地生胸中坦腹夏日眠五柳來薰風  
不絃虞舜琴不觴唐堯鍾况復義皇前豈直將無同  
送大受赴選天官

元祐眞人初御天四門穆穆來忠言閩風學士望朝  
野即日賜環司諫垣當時同列繼登用獨先朝露歸



九原位不酬身在孫子疑疑諸子聲名喧叔也縱橫  
五經內娛目未始窺家園苟聞其所有賢者弊車趺  
僕從之奔甘陵南北正分黨攘臂其間無怨恩未見  
其止見其進會須一指收乾坤素冠俛首琴復御鴈  
飛九萬方化鷗于今怙恃只明主肯與世俗均寒暄  
蚤年妙筆三千牘矧已慟哭論元元韓城父老儻改  
作為報及此高閭門

雙壁歌寄馬叔寶

君不見朱公託身天地中四方萬貨常憧憧其間雙  
璧最奇寶分明日月生西東問公酬價初幾所一者

千金一半此精神肉好非不同側視裁差厚薄耳公  
心夙悟誰得窺但見故橐無留貲交貧族遠富衣食  
高義日與清風馳梁人有獄久不決君臣相顧空嘆  
眉公來答問只一語群疑亟判如著龜須知成效異  
霄壤頗恨儒冠多失之多失之胡弗思它年薄俗待  
爾移奈何璧價先自虧

送表兄華元翰赴四會尉

頤山潁水天西東四載相望二千里我守枯株未得  
還君逐飛蓬忽然至坐令桑梓落眼中頓覺精神到  
塵外昔人逃空喜足音况乃警欬逢昆弟此會由來



天子之幾日冷風清暑氣君才犖犖蚤馳名荆國先  
生曾改視殿前射策失龍頭仕處波濤起平地胸中  
萬慮不一施却作明時嶺南尉太夫人年七十三諸  
子半掩黃壚逝蘭陔養志獨賴君路遠何由復迎侍  
當思有以慰其心莫把光陰較榮悴本朝丞相豈不  
盛尚輩流人已三歲君今補考裁秋冬託身民上與  
之異蕭條官府似僧居春入梅梢更堪醉要須相與  
無町畦卷舌爲喑真得計我家宅相世所知矯首南  
雲從此俟

送竟顯父推官改官

高堂夫人九十餘一子晚方趨仕途前年封邑非子  
致更待子榮新命書子紆墨綬來漢東百里氣和年  
屢豐聲名籍籍動群耳還似當時詩賦中諸公欲默  
安得已爭遡日邊飛薦紙拔身左選歸尚書攄發平  
生從此始攄發平生從此始未足爲子增欣喜所喜  
榮親有期矣郡邑疏恩壽覲齒斑衣兒啼奉甘旨

寄仲弓

道德不與祿位期富貴自隨時命至君賓以明故自  
銷禦寇於羊知去意城南豈復異牆東詩句由來勝  
刺字直作朱游真丈夫莫使小生敢相吏



次德符韻六詩

書懷二首

秋容未覺成蕭颯，脩竹疎桐陰四匝。先生歸駕挾西風，墮我南堂似凋葉。對床邀月入高談，夢想從來謝三接。是非火作正炎空，忍與紛紛競牙頰。莫欺漚鳥不知人，須信天機在眉睫。妙哉託處無何鄉，一念能回百千劫。君誠有意涉其流，請爲崖邊具舟楫。

又

木杪秋風鳴颯颯，環步虛亭日千匝。忽迂征轡入衡門，共看霜輪上雲葉。紫煙收盡擬階升，白露溥空欣手接。何須清酌浣枯腸，自覺爽氣滋雙頰。可憐末路競牛毛，不悟勞生寄蚊睫。向非霸處務功成，爭得盟時遭智劫。西山君故有風期，我亦從今理歸楫。

分韻見簡

幽人寄巖谷，志士從簪纓。所尚初不同，出處皆有行。夫子胡爲哉，飲露冷秋英。和璧以爲質，黃鍾以爲聲。皎皎文史中，久作星斗明。一見輒心降，端如屈人兵。天意亦可料，禍患矧已經。豈其禮樂時，而不收珪珽。故知阿衡任，便是西山清。我豈夫子徒，猥辱藪澤并。驅車遠過我，爲我開天庭。凡今落松塵，皆昔所未聆。



念此坐相阻三十六峯橫子言不子隨猶得座右銘  
與德符仲孺述之宿南堂分韻得客字

從容白露前轉眄一歲隔念我方促裝夫君復來客  
疎篁生晚音霽月澹秋色此會豈易諧未用詢長陌  
南堂分韻得秋字

大火不東駐高堂文字秋青蠅付驅除白日堪遲留  
鷄癰落新烹瓜竟收輕浮尚有明月在儻能如故不  
曾園分韻得得字

藩城富池塘所向取荆棘天風初轉西明簷共來北  
暑清隨處幽道高向人默群鷗安在哉我今均爾得  
再宿南堂分韻得星字

夕雲不成雨冉冉東南征涼月掛河漢鮮風起階庭  
蛩韻響新織螢光駛流星誰知亦有念夙駕在青冥

德符次  
日蚤行







卷之五

七